

四庫全書

集部

欽定四庫全書

集部

西晉文紀卷十

詳校官庶吉士

臣

初喬齡

主事銜

臣

徐以坤覆勘

覆校官博士

臣

劉光第

校對官中書

臣

范 鏊

謄錄舉人

臣

呂日永

欽定四庫全書

西晉文紀卷十

明 梅鼎祚 編

西晉

傅玄

字休奕北地泥陽人歷御史中丞司隸校尉追封清泉侯

上武帝敦風節疏

帝初即位廣納直言玄為散騎常侍與皇甫陶共掌諫職

上疏詔報乃使玄草詔進之帝雖甚善終不能用

臣聞先王之臨天下也明其大教長其義節道化隆於上清議行於下上下相奉人懷義心亡秦蕩滅先王之

制以法術相御而義心亡矣近者魏武好法術而天下
貴刑名魏文慕通達而天下賤守節其後綱維不攝而
虛無放誕之論盈於朝野使天下無復清議而亡秦之
病復發於今陛下聖德龍興受禪宏堯舜之化開正直
之路體夏禹之至儉綜殷周之典文臣詠歎而已將又
奚言惟未舉清遠有禮之臣以敦風節未退虛鄙以懲
不恪臣是以猶敢有言

武帝詔報

舉清遠有禮之臣者此尤今之要也

上興學親農疏

臣聞舜舉五臣無為而化用人得其要也天下羣司猥多不可不審得其人也不得其人一日則損不貲況積日乎典謨曰無曠庶官言職之不可久廢也諸有疾病滿百日不差宜令去職優其禮秩而寵存之既差而後更用臣不廢職於朝國無曠官之累此王政之急也臣聞先王分士農工商以經國制事各一其業而殊其務

自士已上子弟為之立太學以教之選明師以訓之各隨其才優劣而授用之農以豐其食工以足其器商賈以通其貨故雖天下之大兆庶之衆無有一人游手分數之法周備如此漢魏不定其分百官子弟不脩經藝而務交游未知益事而坐享天祿農工之業多廢或逐淫利而離其事徒繫名於太學然不開先王之風今聖明之政資始而漢魏之失未改散官衆而學校未設游手多而親農者少工器不盡其宜臣以為亟定其制通

計天下若干人為士足以副在官之吏若干人為農三
年足有一年之儲若干人為工足其器用若干人為商
賈足以通貨而已尊儒尚學貴農賤商此皆事業之要
務也前皇甫陶上事欲令賜拜散官皆課使親耕天下
享足食之利禹稷躬稼祚流後世是以明堂月令著帝
籍之制伊尹古之名臣耕於有莘晏嬰齊之大夫避莊
公之難亦耕於海濱昔者聖帝明王賢佐俊士皆當從
事於農矣王人賜官冗散無事者不督使學則當使耕

無緣放之使坐食百姓也今文武之官既衆而拜賜不在職者又多加以服役為兵不得耕稼當農者之半南面食祿者叅倍於前使冗散之官農而收其租稅家得其實而天下之穀可以無乏矣夫家足食為子則孝為父則慈為兄則友為弟則悌天下足食則仁義之教可不令而行也為政之要計人而置官分人而授事士農工商之分不可斯湏廢也若未能精其防制計天下文武之官足為副貳者使學其餘皆歸之於農若百工商

賈有長者亦皆歸之於農務農若此何有不贍乎虞書
曰三載考績三考黜陟幽明是為九年之後乃有遷叙
也故居官久則念立慎終之化居不見久則競為一切
之政六年之限日月淺近不周黜陟陶之所上義合古
制夫儒學者王教之首也尊其道貴其業重其選猶恐
化之不崇忽而不以為急臣懼日有陵遲而不覺也仲
尼有言人能弘道非道弘人然則尊其道者非惟尊其
書而已尊其人之謂也貴其業者不妄教非其人也重

其選者不妄用非其人也若此而學校之綱舉矣

武帝詔報

二常侍懇懇於所論可謂乃心欲佐益時事者也而主者率以常制裁之豈得不使發憤耶二常侍所論或舉其大較而未脩其條目亦可便令作之然後主者八坐廣其研精凡闕言於人主人臣之所至難而人主若不能虛心聽納自古忠臣直士之所慷慨至使杜口結舌每念於此未嘗不歎息也故前詔敢有直言勿有所距

庶幾得以發蒙補過獲保高位苟言有偏善情在忠益雖文辭有謬誤言語有失得皆當曠然恕之古人猶不距誹謗况皆善意在可採錄乎近者孔鼂綦毋繇皆按以輕慢之罪所以皆原欲使四海知區區之朝無諱言之忌也

上便宜五事疏

泰始四年玄為御史中丞時有水旱之苗上疏詔報

臣聞聖帝明王受命天時未必無苗是以堯有九年之水湯有七年之旱惟能濟之以人事耳故洪水滔天而

免沈溺野無生草而不困匱伏惟陛下聖德欽明時小
水旱人未大饑下祇畏之詔求極意之言同禹湯之罪
已侔周文之夕惕臣伏歡喜上便宜五事其一曰耕夫
務多種而耕墾不熟徒喪功力而無收又舊兵持官牛
者官得六分士得四分自持私牛者與官中分施行來
久衆心安之今一朝減持官牛者官得八分士得二分
持私牛及無牛者官得七分士得三分人失其所必不
歡樂臣愚以為宜佃兵持官牛者與四分持私牛與官

中分則天下兵作歡然悅樂愛惜成穀無有損棄之憂
其二曰以二千石雖奉務農之詔猶不勤心以盡地利
昔漢氏以墾田不實徵殺二千石以十數臣愚以為宜
申漢氏舊典以警戒天下郡縣皆以死刑督之其三曰
以魏初未留意於水事先帝統百揆分河堤為四部并
水凡五謁者以水功至大與農事並興非一人所周故
也今謁者一人之力行天下諸水無時得徧伏見河堤
謁者車誼不知水勢轉為他職更選知水者代之可分

為五部使各精其方宜其四曰古以步百為畝今以二百四十步為一畝所覺過倍近魏初課田不務多其項畝但務修其功力故白田收至十餘斛水田收數十斛自頃以來日增田頃畝之課而田兵益甚功不能修理至畝數斛已還或不足以償種非與曩時異天地橫過苗害也其病正在於務多頃畝而功不修耳竊見河堤謁者石恢甚精練水事及田事知其利害乞中書召恢委曲問其得失必有所補益其五曰臣以為異域之人

不與華同鮮卑最甚本鄧艾苟欲取一時之利不慮後
患使鮮卑數萬散居人間此必為害之勢也秦州刺史
胡烈素有恩信於西方今烈往諸胡雖已無惡必且消
弭然獸心難保不必其可久安也若後有動釁烈計能
制之惟恐胡虜適困於討擊便能東入安定西赴武威
外名為降可動復動此二郡非烈所制則惡胡東西有
窟穴浮游之地故復為患無以禁之也宜更置一郡於
高平川因安定西州都尉募樂徙民重其復除以充之

以通北道漸以實邊詳議此二郡及新置郡皆使并屬
秦州令烈得專御邊之宜

詔報

得所陳便宜言農事得失及水官興廢又安邊御胡政
事寬猛之宜申省周備一二具之此誠為國大本當今
急務也如所論皆善深知乃心廣思諸宜動靜以聞也

並晉
書

諸官病奏

杜氏
通典

諸官有病滿百日不差宜令去職優其禮秩既差而復用

賀老人星表

老人星見暉景光明聖主壽延享祚元吉自天之祐莫不抃舞

又

老人星見體色光明嘉占元吉弘無量之祐隆克昌之祚普天同慶率土會歡

並藝文類聚

正朔議

秦始皇二年亥為散騎常侍
議詔從之杜氏通典

帝王受命應歷禪代則不改正朔遭變征伐則改之舜
正月上日受終於文祖無改正之文唐虞正朔皆同明
矣夏殷周革命乃改魏受漢禪亦已不改至於服色皆
從其本唯節幡用黃大晉以金德王天下順五行三統
之序矣

五祀議

太平御覽

禮大記云室中央中雷謂四雷之中也祭於漏井蓋失

之矣七祀之文皆云祀行而無井祭竈而不祭井於事則闕夫設祀者非唯報功而已亦神道設教使民慎之幽明也臣以為帝之都城宜祭一門正宮一門正室一戶井竈中雷亦各擇其一正者祭之

何曾荀顗論

晉書

以文王之道事其親者其顗昌何侯乎其荀侯乎古稱曾閔今日荀何內盡其心以事其親外崇禮讓以接天下孝子百世之宗仁人天下之命有能行孝之道君子

之儀表也詩云高山仰止景行行止令德不遵二夫子之景行者非樂中正之道也又曰荀何君子之宗也又曰潁昌侯之事親其盡孝子之道乎存盡其和事盡其敬亡盡其哀予於潁昌侯見之矣又曰見其親之黨如見其親六十而孺慕予於潁昌侯見之矣

吏部尚書箴

明明王範制為九秩君執常道臣有定職各有攸司又用不慝貴無常尊賤不恒卑不明厥德國用顛危昔舜

舉咎繇而俊又在官湯舉阿衡而不仁流屏且表正而
象平日夕而景側處喉舌者患銓衡之無常不患於不
明故曰無謂隱微廢公任私無好自專違衆取怨是以
古之君子無親無疎縱心大倫修己以道弘道以身易
貴好爵書慎官人官不可妄授職不可闇受能者養之

致福不能者弊之招咎衡臣司書敢告左右

初學記
藝文云昔

舜舉皋陶而俊又在官
夔龍出入朕命周仲山
甫亦允納言各有二句
藝文參入範作軌

太子少傅箴

太平御覽

夫金木無常方圓應形亦有隱括習以性成故近墨者黑近朱者赤聲和則響清形正則影直正人在側德義盈堂鮑肆先入蘭蕙不芳傳臣思訓敢告君王

口誠藝文

勿謂何有積怨致咎勿曰不傳伏流成川蟻孔潰河流
穴傾山

擬金人銘作口銘

傅子

神以感通心由口宣福生有兆禍來有端情莫多妄口

莫多言蟻孔潰河溜穴傾山病從口入禍從口出存亡
之機開闔之術口與心謀安危之源樞機之發榮辱存
焉

棟銘

御覽

國有維輔室有棟梁室之傾尚可柱也心之傾不可輔
也

筆銘

韡韡彤管冉冉輕翰正色玄墨銘心寫言

燈銘

晃晃華燈含滋炳靈素膏流液玄炷亭亭丹水陽輝飛

景蘭亭

並初學記

劍銘
并序

道德不修雖有千金之劍何所用之先王觀變而服劍
所以立武象也太上有象而已其次則親用之銘曰光
文耀武以衛乃國

杖銘

杖正心安厥身以隨不安則傾不貞則危

鏡銘

人徒鑒于鏡止于見形鑒於人可以見情

並書鈔

印銘

惟昔先王配天垂則乃設印章作信萬國取象晷度是
銘是刻文明慎密直方其德本立道生歸乎玄默太上
結繩下無荒慝

冠銘

卷十
居高無忘危在上無忘敬懼則安敬則正

履銘

戒之哉念履正無履邪正者吉之路邪者凶之徵

並初學記

衣銘

衣服從其儀君子德也衣以飾外德以備內內修外飾
禮有制也

裳銘

上衣下裳天地則也服從其宜君子德也

並書鈔

被銘

被雖溫無忘人之寒無厚於己無薄於人

澡盆銘

與其澡於水寧澡於德水之清猶可穢也德之修不可塵也

水龜銘

鑄茲靈龜體象自然含出源水有似清泉潤彼玄墨染此弱翰申情寫素經緯羣言

素一作意

並御覽

席左端銘

閒居勿極其歡

席右端銘

寢處毋忘其患

席左後銘

居其安無忘其危

席右後銘

惑生於邪色禍成於多言

龍銘

麗哉神龍誕應陽精潛景九淵飛曜天庭屈伸從時變化無形偃伏汙泥上凌太清

靈虵銘

御覽作
神蛇

嘉茲靈虵斷而能續飛不須翼行不假足上騰霄霧下遊山嶽進此明珠預身龍族

江夏任君銘

君諱脩承洪苗之高胄稟岐嶷之上姿質美珪璋志邈

雲霄景行足以作儀範柱石足以慮安危弱冠而英名
播乎遐邇拜江夏太守內平五教外運六奇邦國乂安
飄塵不作銘曰我我任君應和秀生如山之峙如海之
渟才行闡茂文武是經羣后利德泊然弗營宜享景福
光輔上京如何夙逝不延百齡

書鈔太尉楊彪銘賓
于太僕底閒王馭賓

于鴻臚允正九儀蒞
于少府考定百工

華嶽銘序

易稱灋象莫大乎天地天以高明崇顯而嶽配焉地以

廣厚為基而嶽體焉若夫泰華之為鎮也五嶽列位而存其首三條分方而處其中故能叅兩儀以比德協和氣之絪縕故雲行與雨施興雷風以動物是以古先歷代聖帝明王莫不燔柴加牲尊而祀焉於虞書則西巡狩至於西嶽而親祭焉於禮則大司馬掌其分域而大宗伯典其禮祀也

永寧太僕龐侯誄

蒸蒸孝敬行著閨庭如蘭之芳如金之貞在亂不迴處

暗斯明仁象春日威配秋霜慈恩雨施惠化風揚嘉善
獻親疾惡若讐言品定人倫清濁異流將繼四祖世據削
定天假其年主優其祿等勳伊吕比壽東嶽

漢高祖畫贊

赫赫漢祖受命龍興五星協象神母告徵討秦滅項如
日之升超從側陋光據萬乘

漢明帝贊

肅矣孝明仗法任刑勤綜萬機察下以情未弘道治用

致太平專信俗儒非禮之經

班婕妤畫贊

斌斌婕妤履正修文進辭同輦以禮匡君納侍顯德謹
對解紛退身避害志邈浮雲

並藝文

古今畫贊

信陵

信陵魏雄虎視龍驤謀羸奮駭雷動北疆

又孫武

孫武論兵實妙於神奇正迭用變化無形

明德馬皇后贊 藝文

明德馬后執履貞素光宗六行動遵禮度作后作母帝
諮厥謀國賴內訓家應顯祚

太常趙咨畫贊

天下信之如日月仰之如雲雨仁風翔於路衢禮讓行
於士女時亮天工四門順軌 並書鈔

楊阜贊序

君構潛謀以龍變應事機而虎發山西數郡獲安者君

克敵之勳也

扶風馬鈞序

馬先生天下之名巧也少而游豫不自知其為巧也當此之時言不及巧焉可以言知乎為博士居貧乃思綾機之變不言而世人知其巧矣舊綾機五十綜者五十躡六十綜者六十躡先生患其喪功費日乃皆易以十二躡其奇文異變因感而作者猶自然之成形陰陽之無窮此輪扁之對不可以言言者又焉可以言校也先

生為給事中與常侍高堂隆驍騎將軍秦朗爭論於朝
言及指南車二子謂古無指南車記言之虛也先生曰
古有之未之思耳夫何遠之有二子哂之曰先生名鈞
字德衡鈞者罷之模而衡者所以定物之輕重輕重無
準而莫不模哉先生曰虛爭空言不如試之易效也於
是二子遂以白明帝詔先生作之而指南車成此一異
也又不可以言者也從是天下服其巧矣居京都城內
有地可以為園患無水以灌之乃作翻車令童兒轉之

而灌水自覆更入更出其巧百倍於常此二異也其後
人有上百戲者能設而不能動也帝以問先生可動否
對曰可動帝曰其巧可益否對曰可益受詔作之以大
木彫構使其形若輪平地施之潛以水發焉設為女樂
舞象至今木人擊鼓吹簫作山嶽使木人跳丸擲劍緣
絙倒立出入自在百官行署舂磨鬪鷄變巧百端此三
異也先生見諸葛亮連弩曰巧則巧矣未盡善也言作
之可令加五倍又患發石車敵人之於樓邊懸濕牛皮

中之則墮石不能連屬而至欲作一輪懸大石數十以
機鼓輪為常則以斷懸石飛擊敵城使首尾電至嘗試
以車輪縣瓴甃數十飛之數百步矣有裴子者上國之
士也精通見理聞而哂之乃難先生口屈不對裴
子自以為難得其要言之不已傳子謂裴子曰子所長
者言也所短者巧也馬氏所長者巧也所短者言也以
子所長擊彼所短則不得不屈以子所短難彼所長則
必有所不解者夫巧天下之微事也有所不解而難之

不已其相擊刺必已遠矣心乖於內口屈於外此馬所以
不對也傅子見安鄉侯言及裴子之論安鄉侯又與裴子
同傅子曰聖人具體備物取人不以一揆也有以神取之
者有以言取之者有以事取之者有以神取之者不言而
誠心先達德行顏淵之倫是也以言取之者以變辨是非
言語宰我子貢是也以事取之者若政事冉有季路文學
子游子夏雖聖人之明盡物如有所用必有所試然則
試冉季以政試游夏以學矣游夏猶然況自此而降者

乎何者懸言物理不可以言盡也施之於事言之難盡而試之易知也今若馬氏所欲作者國之精銳軍之要用也費十尋之木勞二人之力不經時而是非定難試易驗之事而輕以言抑人異能此猶以已智任天下之事不易其道以御難盡之物此所以多廢也馬氏所作因變而得是則初所言者不皆是矣其不皆是因不用之是不世之巧無由出也夫同情者相妬同事者相害中人所不能免也故君子不以人害人必以考試為衡

石廢衡石而不用此美玉所以見誣為石荆和所以抱璞而哭之也於是安鄉侯悟遂言之武安侯武安侯忽之不果試也此既易試之事又馬氏巧名已定猶忽而不察沉幽深之才無名之璞乎後之君子其鑒之哉馬先生之巧雖古公輸般墨翟王爾近漢世張平子不能過也公輸般墨翟皆見用於時乃有益於世平子雖為侍中馬先生雖給事省中俱不典工官巧無益於世用人不當其才聞賢不試以事良可恨也裴子者裴秀安

鄉侯者曹義也武安侯者曹爽也

魏志注
引傅子

乘輿馬賦序

往日劉備之初降也太祖賜之駿馬使自至廐選之歷
名馬以百數莫可意者次之下廐有的顱馬委棄莫視
疲瘁骨立劉備撫而取之衆莫不笑之馬超破蘓氏塢
塢中有駿馬百餘匹自超以下俱爭取肥好者而將軍
龐恩獨取一騮馬形觀既醜衆亦笑之其後劉備奔於
荊州馬超戰於渭南逸足電發追不可逮衆乃服馬

箏賦序

箏以為蒙恬所造今觀其器上圓似天下平似地中空
准六合絃柱十二擬十二月設之則四象存鼓之則五
音發體合法度節究哀樂斯乃仁智之器也豈亡國之
臣所能開思運巧哉或以為蒙恬所造非也

琴賦序

神農氏造琴所以協和天下人性為至和之主齊桓有
鳴琴曰號鍾楚莊王有琴曰繞梁司馬相如有焦尾蔡

邕有綠綺皆名器也

琵琶賦序

世本不載作者聞之故老云漢遣烏孫公主嫁昆彌念其行道思慕使工人知音者載琴箏筑篳篥之屬作馬上之樂觀其器中虛外實天地之象也盤圓柄直陰陽之序也柱十有二配律呂也四絃法四時也以方語目之故云琵琶取易傳於外國也杜摯以為嬴秦之末蓋苦長城之役百姓弦鞞而鼓之二者各有所據以意斷

之烏孫近焉

彈碁賦序

漢武帝好蹴鞠劉向以為蹴鞠勞人體竭人力非至尊
所宜御乃因其體而作彈碁以解之今觀其道蹴鞠道
也

藝文投壺賦序云投壺者所以矯懈而注心也

蜀葵賦序

蜀葵其苗似瓜瓠嘗種之一年引苗而生華經二年春
乃發既大而結鮮紫色曜日

並御覽

紫華賦序

藝文

紫華一名長樂華舊生於蜀其東界特饒中國奇而種之
余嘉其華純耐久可歷冬而服故與友生各為之賦

朝華賦序朝
華麗木也

芸香賦序

御覽

始以微香進入終於損棄黃壤吁可閔也遂詠而賦之

又菊賦序詩人觀玉雕而詠后妃之
德屈平見朱橘而申貞臣之志焉

矯情賦序

書鈔

我太宗文皇帝命臣作西征賦又命陳徐諸臣作箴皆含玉吐金爛然成章

擬四愁詩序

傅玄集

張平子作四愁詩體小而俗七言類也聊擬而作之名曰擬四愁詩

七謨序

御覽

昔枚乘作七發而屬文之士若傅毅劉廣世崔駰李尤桓麟崔琦劉梁桓彬之徒承其流而作之者紛焉七激

七欣七依七欸七說七蠲七舉之篇於時通儒大才馬
季長張平子亦引其源而廣之馬作七廣張造七辨或
以恢大道而導幽滯或以黜瑰彥而託諷詠揚暉播烈
垂於後世者凡十有餘篇自大魏英賢迭作有陳王七
啓王氏七釋楊氏七訓劉氏七華從父侍中七誨竝陵
前而邈後揚清風於儒林亦數篇焉世之賢明多稱七
激工余以為未盡善也七辨似也非張氏至思比之七
激未為劣也七釋僉曰妙哉吾無閒矣若七依之卓轅

一致七辨之纏綿精巧七啓之奔逸壯麗七釋之精密
閒理亦近代之所希也

叙連珠 藝文

所謂連珠者興於漢章帝之世班固賈逵傅毅三才子
受詔作之而蔡邕張華之徒又廣焉其文體辭麗而言
約不指說事情必假喻以達其旨而覽者微悟合於古
詩勸興之義欲使歷歷如貫珠易觀而可悅故謂之連
珠也班固喻美辭壯文章弘麗最得其體蔡邕似論言

質而辭碎然旨篤矣賈逵儒而不豔傅毅文而不典

勸御

覽作
諷

祝祖文

祖君自東百靈齊行翠蓋翩翩象輿彫箱王于進駕駢

服調良

書鈔 魏德頌朱旗翳天玄甲炤路又戎車萬
駟逸驥千羣 客難振筆若天文運思苦迴雲

傳咸

字長虞玄子嗣封歷御
史中丞兼司隸校尉

上武帝省官重農奏

咸寧中咸遷司徒左長史
時帝留心政道詔問朝臣

政之損
益上言

陛下處至尊之位而修布衣之事親覽萬機勞心日是
在昔帝王躬自菲薄以利天下未有踰陛下也然泰始
開元以暨于今十有五年矣而軍國未豐百姓不贍一
歲不登便有菜色者誠由官衆事殷復除猥濫蠶食者
多而親農者少也臣以頑疎謬忝近職每見聖詔以百
姓饑饉為慮無能云補伏用慙慙敢不自竭以對天問
舊都督有四今并監軍乃盈於十夏禹敷土分為九州
今之刺史幾向一倍戶口比漢十分之一而置郡縣更

多空校牙門無益宿衛而虛立軍府動有百數五等諸
侯復坐置官屬諸所寵給皆生於百姓一夫不農有受
其饑今之不農不可勝計縱使五稼普收僅足相接暫
有蓄患便不繼贍以為當今之急先并官省事靜事息
役上下用心惟農是務也

論世俗奢侈書

時為車
騎司馬

臣以為穀帛難生而用之不節無緣不匱故先王之化
天下食肉衣帛皆有其制竊謂奢侈之費甚於天蓄古

者堯有茅茨今之百姓競豐其屋古者臣無玉食今之
賈豎皆厭梁肉古者后妃乃有殊飾今之婢妾被綾羅
古者大夫乃不徒行今之賤隸乘輜驅肥古者人稠地
狹而有儲蓄由於節也今者土曠人稀而患不足由於
奢也欲時之儉當詰其奢奢不見詰轉相高尚昔毛玠
為吏部尚書時無敢好衣美食者魏武帝歎曰孤之法
不如毛尚書令使都部用心各如毛玠風俗之移在不

難矣

並晉書

請貶荀愷奏

司隸荀愷從兄喪自表赴哀詔聽之而未下乃造楊駿咸為尚書左

丞奏愷惠帝以駿管朝政不問

死喪之戚兄弟孔懷同堂亡隕方在信宿聖恩矜憫聽使臨喪詔未下而便以行造急諂媚之敬無友于之情宜加顯貶以隆風教

上惠帝論補內官書

詔羣僚舉郡縣之職以補內官咸為御史中丞上書

臣咸以為夫興化之要在於官人才非一流職有不同譬諸林木洪纖枉直各有攸施故明揚逮於仄陋疇咨

無拘內外之任出處隨宜中間選用惟內是隆外舉既
頽復多節目競內薄外遂成風俗此弊誠宜亟革之當
內外通塞無所偏耳既使通塞無偏若選用不平有以
深責責之苟深無慮不平也且膠柱不可以調瑟況乎
官人而可以限乎伏思所限者以防選用不能出人不
能出人當隨事而制無須限法法之有限其於致遠無
乃泥乎或謂不制其法以何為責臣聞刑懲小人義責
君子君子之責在心不在限也正始中任何晏以選舉

內外之衆職各得其才粲然之美於斯可觀如此非徒御之以限法之所致乃委任之由也委任之懼甚於限法是法之失非已之尤尤不在已責之無懼所謂齊之以刑人免而無恥者也苟委任之一則慮罪之及二則懼致怨謗已快則朝野稱詠不善則衆惡見歸此之戰戰孰與倚限法以苟免乎

並晉書

劾夏侯承奏

咸為御史中丞奏詔免承官

少府夏侯承取官田立私屋近小人委以家計令工匠

竊盜官物附益於私所營唯利醜問充斥大臣穢濁無

以為訓

王隱
晉書

劾夏侯駿事

令史張濟案行城東見有新立屋間葺范障二十丈推

問是少府夏侯駿所作請免駿官

御覽

上自陳表

咸遭繼母憂去職起以議郎長兼
司隸校尉催使攝職上表陳乞

臣既駑弱不勝重任加在哀疾假息日闕陛下過意授
非所堪披露丹款歸窮上聞謬詔既往終然無改臣雖

不能減身以全禮教義無覩然虛忝隆寵前受嚴詔視
事之日私心自誓墮越為報以貨賂流行所宜深絕切
勅都官以此為先而經彌日月未有所得斯由陛下有
以獎厲慮於愚戇將必死繫故自掩檢以避其鋒耳在
職有日既無赫然之舉又不應弦垂翅人誰復憚故光
祿大夫劉毅為司隸聲震內外遠近清肅非徒毅有王
臣匪躬之節亦由所奏見從威風得伸也

惠帝詔報

但當思必應繩中理威風自伸何獨劉毅

劾王戎奏

咸以長吏到官未幾便還百姓困於無定吏卒疲於送迎時僕射王戎兼

吏部領選咸奏免官下詔解禁御史中丞解結以咸劾戎為越局侵官奏免咸詔亦不問

書稱三載考績三考黜陟幽明今內外羣官居職未期而戎奏還既未定其優劣且送故迎新相望道路巧詐由生傷農害政戎不仰依堯舜典謨而驅動浮華虧敗風俗非徒無益乃有大損宜免戎官以敦風俗

同前

前見王戎傳此傳咸傳

戎備位台輔兼掌選舉不能謐靜風俗以凝庶績至今
人心傾動開張浮競中郎李重季義不相匡正請免戎
等官

惠帝詔報

政道之本誠宜久於其職咸奏是也戎職在論道吾所
崇委其解禁止

上論劾王戎事

咸復奏稱引故事條理灼然朝廷無以易之

案令御史中丞督司百僚皇太子以下其在行馬內

有違法憲者彈糾之雖在行馬外而監司不糾亦得奏之如今之文行馬之內有違法憲謂禁防之事耳宮內禁防外司不得而行故專施中丞今道路橋梁不修鬪訟屠沽不絕如此之比中丞推責州坐即今所謂行馬內語施於禁防既云中丞督司百僚矣何復說行馬之內乎既云百僚而不得復說行馬之內者內外衆官謂之百僚則通內外矣司隸所以不復說行馬內外者禁防之事已於中丞說之故也中丞司隸俱糾皇太子以

下則共對司內外矣不為中丞專司內百僚司隸專司外百僚自有中丞司隸以來更互奏內外衆官惟所糾得無內外之限也而結一旦橫挫臣臣前所以不羅縷者冀因結奏得從私願也今既所願不從而勅云但為過耳非所不及也以此見原臣忝司直之任宜當正已率人若其有過不敢受原是以申陳其愚司隸與中丞俱共糾皇太子以下則從皇太子以下無所不糾也得糾皇太子而不得糾尚書臣之閤塞既所未譬皇太

子為在行馬之內邪皇太子在行馬之內而得糾之尚書在行馬之內而不得糾無有此理此理灼然而結以此挫臣臣可無恨耳其於觀聽無乃有怪邪臣識石公前在殿上脫衣為司隸荀愷所奏先帝不以為非于時莫謂侵官今臣裁糾尚書而當有罪乎

並晉書

特進執璧奏

王隱晉書百官表

公品第一執珪坐侍臣之上特進品第二執皮帛坐侍臣之下以有舊制今啓特進宜執璧繼公

奏事

初學記

尚書舊奏給介士二百人人給大銅口刀各一枚

請立二社表

太康九年詔曰社實一神其并二社之禮司馬傳咸表

祭法二社各有其義天子尊事郊廟故冕而躬耕也者所以重孝享之粢盛致殷薦於上帝也穀梁傳曰天子親耕以供粢盛親耕謂自報自為立社者為藉而報也國以人為本人以穀為命故又為百姓立社而祈報焉事異報殊此社之所以有二也王景侯之論王社亦謂

春祈藉田秋而報之也其論太社則曰王者布下圻內
為百姓立之謂之太社不自立之於京師也景侯此論
據祭法大夫以下成羣立社曰置社景侯解曰今之里
社是也景侯解祭法則以置社為人間之社矣而別論
復以太社為人間之社未曉此旨也太社天子為人而
祀故稱天子社郊特牲曰天子太社必受霜露風雨夫
以羣姓之衆王者通為立社故稱太社若夫置社其數
不一蓋以里所為名左氏傳盟於清丘之社是也人間

之社既已不稱太矣若復不立之京都當安所立乎祭
法又曰王為羣姓立七祀自為立七祀言自為者自為
而祀也為羣姓者為羣姓而祀也太社與七祀其文正
等說者窮此因云墳籍但有五祀無七祀也案祭五祀
國之大祀七者小祀周禮所云祭凡小祀則墨冕之屬
也景侯解大厲曰如周杜伯鬼有所歸乃不為厲今云
無二社者稱景侯祭法不謂無二則曰口傳無其文也
夫以景侯之明擬議而後為解而欲以口論除明文如

此非但二社當是思惟景侯之後解亦未易除也前被
勅尚書召誥社於新邑惟一太牢不二社之明義也案
郊特牲曰社稷太牢必援一牢之文以明社之無二則
稷無牲矣說者則曰舉社以明稷何獨不可舉一以明
二國之大事在祀與戎若有過而除之不若過而存之
況存之有義而除之無據乎周禮封人掌設社壇無稷
字今帝社無稷蓋出於此然國主社稷故經傳動稱社
稷周禮王祭稷則絺冕此王社有稷之文也封人設壇

之無稷字說者以為略文從可知也謂宜仍舊立二社

而加立帝社之稷

二社晉書作王社太社人間作衆庶說者曰舉社則稷可知苟可舉社以

明稷何獨不舉一以明二社壇作社壇設壇作所掌設社壇

續上二社表

時成絜議景侯論太社不立京都欲破鄭氏咸重表景侯王肅

如絜之論景侯之解文以此壞大雅云乃立冢土毛公

解曰冢土太社也景侯解詩即用此說禹貢惟土五色

景侯解曰王者取五色土為太社封四方諸侯各割其

方色王者覆四方也如此太社復為立京都也不知此

論從何出而與解車上違經記明文下壞景侯之解臣
雖頑蔽少長學問不能默已謹復續上梁晉書作祭法
從何出作何從
出而

武帝詔

社實一神而相襲二位衆議不同何必改作其使仍舊

一如魏制

並宋書

遷尚書左丞表

書鈔

左丞職輕事重以賤制貴人所難居臣以闇劣猥忝斯

任愧於不稱懼罪之及夙夜惶恐寢食無寧

理李含表

含字世容任歷秦國郎中令領始平中正元康中秦王薨含依臺儀葬訖

除喪尚書趙浚奏含不應除喪本州大中正傳祇以名義貶含咸為御史中丞上表惠帝

不從遂被貶退

臣州秦國郎中令始平李含忠公清正才經世務實有
史魚秉直之風雖以此不能協和流俗然其名行峻厲
不可得掩二郡並舉孝廉異行尚書郭奕臨州含寒門
少年而奕超為別駕太保衛瓘辟含為掾每語臣曰李

世容當為晉匪躬之臣秦王之薨悲慟感人百僚會喪
皆所目見也而今以含俯就王制謂之背戚居榮奪其
中正天王之朝既葬不除藩國之喪既葬而除藩國欲
同不除乃當責引尊卑非所宜言耳今天朝吉于上
欲令藩國服于下此為藩國之義隆而天朝之禮薄也
又云諸王公皆終喪禮寧盡乃叙明以喪制宜隆務在
敦重也夫寧盡乃叙明以哀其病耳異於天朝制使終
喪未見斯文國制既葬而除既除而祔爰自漢魏迄于

聖晉文皇升遐武帝崩殂世祖過哀陛下毀頓銜疚諒
闇以終三年率土臣妾豈無攀慕遂服之心實以國制
不可而踰故於既葬不敢不除天王之喪釋除於上藩
國之臣獨遂於下此不可安復以秦王無後含應為喪
主而王喪既除而祔則應吉祭因曰王未有廟主不應
除服秦王始封無所連祔靈主所居即便為廟不問國
制云何而以無廟為貶以含今日之所行移博士使案
禮文必也放勛之殂過密三載世祖之崩數旬即吉引

古繩今闔世有貶何但李含不應除服今也無貶王制
故也聖上諒闇哀聲不輟股肱近侍猶宜心喪不宜便
行婚娶歡樂之事而莫云者豈不以大制不可而曲邪
且前以含有王喪上為差代尚書勅王葬日在近葬訖
含應攝職不聽差代葬訖含猶躊躇司徒屢罰訪問踰
含攝職而隨擊之此為臺勅府符陷含於惡若謂臺府
為傷教義則當據正不正符勅唯含是貶含之困躋尚
足惜乎國制不可偏耳又含自以隴西人雖戶屬始平

非所綜悉自初見使為中正反覆言辭說非始平國人不
宜為中正後為郎中令又自以選官引臺府為比以
讓常山太守蘓韶辭意懇切形於文墨含之固讓乃在
王未薨之前葬後躊躇窮於對罰而攝職耳臣從弟祇
為州都督意在欲隆風教議含已過不良之人遂相扇
動冀挾名義法外致案足有所邀中正龐騰便割含品
臣雖無祁大夫之德見含為騰所侮謹表以聞乞朝廷
以時博議無令騰得妄弄刀尺

晉書

俯就王制下通
典作如今除服塋後十

七日乃親中正職時議謂之背戚居榮奪其中正而復
閔於天子之喪既塋而除便云天朝殊尊援以為准非
所宜言若王者之喪既葬不除藩國之喪既塋而除藩
國欲同不除乃當云天朝殊尊援以為准非所宜言耳
禮薄也下有未喻此旨四字下有皆所共行四字而王
喪既除而祔作于今之制既葬應除而祔過密三載世
祖之崩數旬即吉引古絕今闔世有貶作四海過密八
音至于三載太宗之崩曾不數旬釋然即吉引古絕今
闔代皆應有貶跼舍下有含乃視事含承天臺之勅逼
司徒之符然後攝職臺府作臺勅府符臺府為比下有
不應為中正一句為騰所
海下有不勝其憤一句

又表

杜氏
通典

臣以國之大制不可而偏秦國郎中令李含承尚書之

勅奉喪服之命既葬除服而中正龐騰無所據仗貶含
品三等謂此未值漢魏以來施行之制具以表聞未嘗
朝廷當云何騰等之論以秦王無後前又有詔以此謂
含不應除服愚謂諸侯之制不得異於天朝就秦王有
嗣於制亦自應除且秦王無後乃前有詔朝野莫不聞
知而尚書下勅葬訖含自應攝職不應差代尋舉為臺
郎又司徒摘罰訪問催含攝職如此臺府亦皆謂含既
葬應除也相是純臣羣臣之首奏令含釋服亦無餘疑

至於舍除便獨為罪竊謂有負於情臣之在事小大欲
盡使在優崇況國之大制當垂將來心所不安而不敷
寫謹重以聞乞中書見詰猶百慮當一得也

涼州表

御覽

涼州民先辨靴從軍之物然後作衣

與太傅楊駿書

咸為尚書左丞惠帝即位駿以太后父輔政咸言於駿

事與世變禮隨時宜諒闇之不行尚矣由世道彌薄權
不可假故雖斬馬在疚而躬覽萬機也逮至漢文以天

下體大服重難久遂制既葬而除世祖武皇帝雖大孝
烝烝亦從時擇服制心喪三年至於萬機之事則有不
遑今聖上欲委政於公諒闇自居此雖謙讓之心而天
下未以為善天下未以為善者以億兆顓顓戴仰宸極
聽於冢宰懼天光有蔽人心既已若此而明公處之固
未為易也竊謂山陵之事既畢明公當思隆替之宜周
公聖人猶不免謗以此推之周公之任既未易而處况
聖上春秋非成王之年乎得意忘言言未易盡苟明公

有以察其恠欵言豈在多

與汝南王亮書

亮輔政為太宰欲取悅衆論誅楊駿之功督將侯者千八十一

人咸為御史
中丞致書

咸以為太甲成王年在蒙幼故有伊周之事聖人且猶
不無疑況臣既不聖主非孺子而可以行伊周之事乎
上在諒闇聽於冢宰而楊駿無狀便作伊周自為居天
下之安所以至死其罪既不可勝亦是殿下所見駿之
見討發自天聰孟觀李肇與知密旨耳至於論功當歸

美於上觀等已數千戶縣侯聖上以駿死莫不欣悅故
論功寧厚以叙其歡心此羣下所宜以實裁量而遂扇
動東安封王孟李郡公餘侯伯子男既妄有加復又三等
超選此之熏赫震動天地自古以來封賞未有若此者
也無功而厚賞莫不樂國有禍禍起當復有大功也人
而樂禍其可極乎作此者皆由東安公謂殿下至止當
有以正之正之以道衆亦何所怒乎衆之所怒在於不
平耳而今皆更倍論莫不失望咸之愚冗不惟失望而

已竊以為憂又討駿之時殿下在外實所不綜今欲委重故令殿下論功論功之事實未易可處莫若坐觀得失有

居正之事宜也

殿中郎孟觀李肇構楊太后父駿於賈后廢駿而東安公繇率衆討駿進封東安王

又諫汝南王書

咸復以亮輔政專權又諫之

楊駿有震主之威委任親戚此天下所以誼譁今之處重宜反此失謂宜靜默頤神有大得失乃維持之自非大事一皆抑遣比四造詣及經過尊門冠蓋車馬填塞街衢此之翕習既宜弭息又夏侯長容奉使為先帝請

命祈禱無感先帝崩背宜自咎責而自求請命之勞而公以為少府私竊之論云長容則公之姻故至於此一大吠形羣犬吠聲懼於羣犬遂至叵聽也咸之為人不能面從而有後言嘗觸楊駿幾為身禍況於殿下而當有惜往從駕殿下見語卿不識韓非逆鱗之言耶而歛摩天子逆鱗自知所陳誠頷頷觸猛獸之鬚耳所以敢言庶殿下當識其不勝區區前摩天子逆鱗欲以盡忠令觸猛獸之鬚非欲為惡必將以此見恕

並晉書
侯駿字長容

又與汝南王牋

亮以衛權為尚書郎咸與亮牋權字伯與陳留襄邑人見三

都賦

衛伯與貴妃兄子誠有才章應作臺郎然未得東宮官屬東宮官屬前思楊駿親理塞路今有伯與復越某作

郎一犬吠形羣犬吠聲懼於羣吠遂至回聽

傅咸集書鈔答曹

志書英氣泉涌逸藻波騰

司隸教書鈔

司隸校尉舊號卧虎誠以舉綱而萬目理提領而衆毛

金匱要略卷十
順者也

順一作從

又教 御覽

聞南方有蜀嫗作茶粥賣之廉事歐其器具使無為賣餅於市而禁茶粥以困老嫗獨何哉

又教 傅咸集

屠牛酤酒鑿錢作錫皆有損害

相諭草 書鈔

黃紙故事鋪不上皆取急與自頃多廢輒皆移病前門

自今以後尚書鋪上不朽急

朽音烏引也又音枯

御史中丞箴

并序御覽

百官之箴以箴王闕余承先君之蹤竊謂憲臺懼有忝累垂翼之責且造斯箴以自勗厲不云自箴而云御史中丞箴者凡為御史中丞通以箴之也詞曰

煌煌天文衆星是環爰立執法其暉有煥執憲之綱秉國之憲鷹揚虎視肅清違慢蹇蹇匪躬是曰王臣既直其道奚顧其身身之不顧孰有弗震邦國若否惟仲山

甫是明焉用彼相莫扶其傾淮南構逆實憚汲生赫赫
有國可無忠貞憂責有在繩亦必直良農耕穢勿使能
植無禮是逐安惜翅翼咨爾庶僚各敬乃職無為罰先
無怙厥力怨及朋友無慙于色得罪天子內省有惡是
用作箴惟以自勅

燭銘 御覽

煌煌丹燭焰焰飛光取則龍景擬象扶桑照彼玄夜炳
若朝陽焚形監世無隱不彰

印竹杖銘

藝文

嘉茲竒竹質勁體直立比高節示世矜式

扇銘

書鈔

武都太守房仲發遺扇無以報為銘以識之云行藏惟
時孔顏齊軌

皇太子釋奠頌

蒸蒸皇儲既睿且聰神而明之夫豈發蒙謙以制禮靡
事不恭企茲良辰卜近于中乃修嘉薦于國之雍敬享

先師以疇聖功疊疊皇儲希心闕里光光輿服穆穆容
止祇奉聖靈躬承明祀濟濟儒生侁侁胄子清酒千觴
匪宴斯喜欣道之弘自今以始初學記藝文類聚載云生而知之上于皇儲
以能而問處實若虛爰雕聖章玉采是敷乃備嘉薦于國之雍敬享先師以疇聖功

中郎將曹府君碑

伊父文朝雅然正色既侍皇帷讜言常則

北堂書鈔襄邑侯誄云言

研其幾文
艷春蘭

感別賦序

友人魯叔虎雅量弘濟思心遼遠余自少與之相長情
相親愛有如同生其後遷太子洗馬俄而謬蒙朝私猥
忝斯職雖懼不稱而喜得與此子同班共事天下之遇
未有若此周旋三載魯生遷尚書郎雖別不遠而情甚
悵恨退作茲賦云爾

伸懷賦序

余自無施繆為衆論所許補太子洗馬才不稱職意常

默然

並御覽

金史卷之二十一
卷十
喜雨賦序

泰始九年自春不雨以涉夏節草木共然百姓以堯有
九載之水湯有七年之旱恐遭斯運並有懼心聖皇勞
慮分使祈禱徧於羣望余以太子洗馬兼司徒請雨百
辟蒞事三朝而大雨降退作斯賦並藝文

感涼賦序

初學記

盛夏月困於炎熱熱甚不過旬日而復自涼以時之涼
命親友曲會作賦爾

神泉賦序

御覽

余所居庭前有湧泉在夏則冷涉冬而溫溫則水物冬
生冷則冰可以過每夏游之不知歲之有暑耳

登芒賦序

傅咸集

左光祿大夫濟北侯荀公前薨元妃及失令子塋於西
芒有以感懷而作斯賦

玉賦序

藝文

易稱乾為玉玉之美與天合德其在玉藻仲尼論之備

矣非復鄙文所可稱述

畫像賦序

先有畫卞和之像者以為臧文仲之知柳下惠之賢而不與立卞和自刖以有證相去遠矣戲畫其像於卞子之旁特赤其面以示猶有慙色

相風賦序

相風之賦蓋以富矣然辭義大同惟中書張令以太史相風獨無文飾故特賦之太僕寺丞武君賓樹一竹於

前庭其上頗有樞機挿以鷄毛於以占事知來與彼無異斯乃簡易之至有殊太史相風張氏之賦非其至者也

也

並御覽

犀鉤賦序

藝文

世稱鷄駭之犀聞之父常侍曰犀之美者有光鷄見影而驚故曰駭鷄有以此鉤見遺者乃為之銘

羽扇賦序

世說注

昔吳人直截鳥翼而搖之風不減方圓二扇而功無加

然中國莫有生意者滅吳之後翕然貴之無人不用

汙卮賦序

人有遺余瑠璃卮者小兒竊弄墮之不絜意既惜之又感物之汙辱乃喪其所以為寶况君子行身而可以有玷乎

燭賦序

余治獄至長安在遠多懷與同行夜飲以忘愁顧惟燭之自焚以致用亦猶殺身以成仁矣感為之賦

並藝文

櫛賦序

書鈔

大才治世猶櫛之理髮也理髮不可無櫛治世不可無才

儀鳳賦序

鷦鷯賦者廣武張侯之所造也以其形微處卑物莫之害也而余以為物生則有害有害而能免所以貴乎才智也夫鷦鷯既無智足貴亦禍害未免乎禍害者其唯儀鳳也

鷺賦序

有言鷺今年巢在此明歲故復來者其將逝翦爪識之

其後果至焉

並藝文

鳩賦序

余舍下種楸蔚然成林閔居無為有時遊之顧見斑鳩
音聲可悅於是捕而畜之既而馴擾偶出之籠無何失
之其後時一來飛翔低首似如有戀故聊賦之

粘蟬賦序

櫻桃其為樹則多蔭其為果則先熟故種之於廳所之前時以盛暑逍遙其下有蟬鳴焉仰而見之故命粘取以弄小兒退惟當蟬之得意於斯樹不知黏之將至亦猶人之得意於富貴而不虞禍之將來也

蜉蝣賦序

讀詩至蜉蝣感其雖朝生暮死而能修其翼可以有興遂賦之

叩頭蟲賦序

叩頭蟲蟲之微細者然教之輒叩頭人以其叩頭傷之不祥故莫之害也

並御覽

螢火賦序

余曾獨處夜不能寐顧見螢火意遂有感於是執以自照而為之賦

桑樹賦序

世祖昔為中壘將軍於直廬種桑一株迄今三十餘年其茂盛不衰皇太子入朝以此廬為便坐

舜華賦序

佳其日新之美故種之前庭而為之賦

並藝文

芸香賦序

先君作芸香賦詞美高麗有覩斯卉蔚茂馨香同遊
使余為序

欵冬賦序

余曾逐禽登於北山于時仲冬之月也冰凌盈谷積雪
被崖顧見欵冬煜然始敷

太平御覽載此下皆韻語實賦非序也楊慎丹鉛錄引作

序恐
非

答辛曠詩序

初學記

尚書左丞彈八座以下居萬機之會斯乃皇朝之司直
天臺之管轄余前為右丞具知此職之要後忝此任僂

俛從事日慎一日

一作答卡壺詩序

答潘尼詩序

司州秀才潘正叔識通才高以文學溫雅為博士余性
直而處清論褒貶之任作詩以見規雖褒飾之舉非所

敢聞而斐祭之辭良可樂也答之雖不足以相酬報所謂盡各言志也

答樂弘詩序

安樂令樂弘太傅鉅平侯羊公辟未就而公薨後應司州之命舉秀才博文通濟之士余失和於府當換為護軍司馬賦詩見贈答之云爾

贈何劭王濟詩序

朗陵公何敬祖咸之從內兄國子祭酒王武子咸從姑

之外孫也並以明德見重於世咸親之重之情猶同生義則師友何公既登侍中武子俄而亦作二賢相得甚歡咸亦慶之然自恨闇劣雖願甚繾綣而從之末由歷試無效且有家艱心存目替賦詩申懷以貽之云爾

傅祗

字子莊咸從父弟歷司徒封靈川縣公

與太傅楊駿書

祗為常侍左軍將軍武帝崩梓宮在殯駿輔政欲悅衆心議普

進封爵祗與駿書駿不從

未有帝王始崩臣下論功者也 晉書

傅暢

祇少子歷秘書丞歿於石勒為大將軍右司馬

自叙 御覽

暢字洪道年五歲散騎常侍扶風魯叔虎與先公甚友善以德量喜與余戲常解衣褶被其背脫余金鐸與侍者謂余當恠惜而余笑與之經數日不索遂於此見名言論甚重

晉書字世道

時請定九品以余為中正余以祖考歷代掌州鄉之論又兄宣年三十五立為州都令余以少年復為此任政

至於上品以宿年為先是以鄉里素滯屈者漸得叙也

杜萬年

相風賦序

太僕傳侯命余賦之誠知武夫在野非荆寶之倫長庚

啓明非曜靈之匹

御覽

西晉文紀卷十